

TE 'TOU GALUEGA TALAI

IULAI 2013

TE VAIASO E KAMATA I A IULAI PO 8

Te Pese e 43 mo te 'Talo

□ **Sukesukega a te Fakapotopotoga ki te Tusi Tapu:**

bt mata. 9 ¶8-18 (30 minu.)

□ **Te Akoga mō Tino Talai:**

Faitauga ki te Tusi Tapu: Galuega 15-17 (10 minu.)

Napa 1: Galuega 16:16-34 (4 minu. io me mu'tana ifo)

Napa 2: Kaia e Mafai ei o Fiafia se Kelisiano Māfai ko Fakasauagina?—Mata. 5:11, 12 (5 minu.)

Napa 3: Se a te "Lalolagi" Telā e 'Tau o 'Vae Keatea Tatou Mai i ei? (Ioane 15:19) —*lv mata. 5 pala. 1-2 (5 minu.)*

□ **Te Fakatasiga mō te Galuega Talai:**

Te Pese e 75

10 minu: Auala e Talai Atu ei te Tala 'Lei—Te 'Taki-maiga o Tino Fia'fia ki te Fakapotopotoga a Ieova.

Se lāuga telā e fakavae ki te tusi ko te Fakatoka, Itulau e 92-102, te itulau e 5, te palakalafa e 7-9. 'Kami atu a te kautaina ke fakamatala mai ne latou a auala ne fakaoga ei ne latou a te polosiuia ko te Loto o Ieova ke takitaki mai ei olotou akoga faka-te-Tusi Tapu ki te fakapotopotoga.

10 minu: Toftofo Aka a Ieova, Kae ka Maua a Fakamanuiaga e Lava Kae 'Toe (Mala. 3:10) Ke fakasau'tala aka a paenia tumau e tokolua io me e tokotolu. Se a te 'toe mea fakafafia ki a latou i te galuega fakapaenia? Ne fesoasoani atu pefea a te galuega fakapaenia ki a latou i te feitu faka-te-agaga? 'Kami atu latou ke fakamatala mai so se tala gali ne maua ne latou. Ke fakaoti te vaega tenei mai te 'Kami atu ki tino talai ke mafau'fau o paenia tumau i a Setema.

10 minu: "Ke Tauloto Mai te Kau Pelofeta—Ioelu." Fesili mo tali.

Te Pese e 54 mo te 'Talo

Ke Tauloto Mai te Kau Pelofeta —Ioelu

¹ Ko oi te pelofeta ko Ioelu? E fakaasi mai fua ne ia me i a ia ko te "tama a Petueli." (Ioe. 1:1) Ne faka'mafa mai ne te pelofeta loto maulalo tenei a te fekau a Ieova, kae e se ko tena tulaga e pelā me

1. E mafai pefea o fakaakoako atu tatou ki te loto maulalo o Ioelu i te taimi e talai atu ei tatou?

se avefekau. E penā foki loa, i te 'tou galuega talai, i lō te fakatāua o tavaega io me ko pati fakafetai e tuku mai, e takitaki atu eiloa ne tatou a tino ki a Ieova mo te Tusi Tapu. (1 Koli. 9:16; 2 Koli. 3:5) E se gata i ei, e maua foki eiloa ne tatou a te malosi mai te fekau telā e folafola atu ne tatou. Ne a vaega o te valoaga a Ioelu e fakamalosi aka ei a te loto finafinai mo te fakamoemoega i a tatou i aso nei?

² **'A te Aso o Ieova ko Pili Mai.'** (Ioe. 1:15): E tiga eiloa ne tusi a pati konei i te fia afe o tau-saga ko 'teka, ko ola tonu eiloa nei tatou i te taimi o tena fakataunuga fakaoti. A tulaga ma'sei o te lalolagi, te sē fia'fia mo fakatauemuga e fe'paki mo tatou i 'tou koga talai ne fakamaoniga mautinoa me ko oko mai eiloa a aso fakaoti o te olaga masei tenei. (2 Timo. 3:1-5; 2 Pe. 3:3, 4) Kafai e mafau'fau tatou ki te pili mai o te gataga, e fai ei ke fakamuamua faeloa a te galuega talai i 'tou olaga.—2 Pe 3:11, 12.

³ **'Ka Puipui Eiloa ne Ieova Ana Tino.'** (Ioe. 3:16): A te 'pa mai o tena leo i te fuaiupu tenei e mafai o fakauiga ki te fakaokomaiga o te fakamasinoga a Ieova i te taimi o te fakalavelave lasi. E maua eiloa ne tatou a te fakamafanafanaga ke iloa atu me ka faka'sao eiloa ne Ieova ana tavini fakamaoni i te taimi tena. (Faka. 7:9, 14) I te taimi e 'kau atu ei tatou ki te galuega talai kae lagona ne tatou a te fesoasoani mo te fakamalosi mai o Ieova, e fai ne te mea tenā ke ati aka i loto i a tatou a te fakatuanaki mo te loto kufaki telā ka fesoasoani malosi i te taimi e oko mai ei a te fakalavelave lasi.

⁴ E tiga eiloa ne taku ne nisi tino a te fekau a Ioelu e pelā me se mea fakafanoanoa, e tuku mai loa i ei a te fakamoemoega 'malu o te faka'saoga o tino o te Atua. (Ioe. 2:32) Ke na fakafesagai atu nei tatou ki aso mai mua i te loto talitonu mo te loto finafinai i te folafolaatuga o te tala 'lei e uiga ki te Malo o te Atua i te taimi e faka'logo ei tatou ki pati i te Ioelu 2:23: "Ke fia'fia koutou . . . ki mea ne fai ne [Ieova] te otou Atua."

2. Se a te mea e 'tau o fakamalosi aka ne te pili mai o te aso o Ieova ke fai ne tatou?
3. Kaia e tāua malosi ei a te galuega talai i te taimi ko pilipili atu ei tatou ki te fakalavelave lasi?
4. Kaia e fia'fia ei tatou ke fakafesagai atu ki aso mai mua mo te loto talitonu?

TE VAIASO E KAMATA I A IULAI PO 15

Te Pese e 48 mo te 'Talo

□ Sukesukega a te fakapotopotoga ki te Tusi Tapu:

bt mata. 9 ¶19-24, pokisi i te itu. 81 (30 minu.)

□ Te Akoga mō Tino Talai:

Faitauga ki te Tusi Tapu: Galuega 18-21 (10 minu.)

Napa 1: Galuega 20:17-38 (4 minu. io me mu'tana ifo)

Napa 2: E Fakaasi Atu Pefea ne Tatou te 'Tou A'lofa Fakamaoni ki te Keliso?—/v mata. 5 pala. 3-6 mo te pokisi i te itulau e 60 (5 minu.)

Napa 3: E Mafai Pefea o Fakaasi Atu me e Mafau'fau Faeloa Tatou ki te Agaga?—Loma 8:6 (5 minu.)

□ Te Fakatasiga mō te Galuega Talai:

Te Pese e 92

10 minu: Ke Fakaoko Faka'lei Atu te Munatonu ki te Loto o Tau Akoga Faka-te-Tusi Tapu. (Luka 24:32) Se sau'talaga telā e fakavae ki fesili konei: (1) Kafai ko fai se akoga faka-te-Tusi Tapu, kaia e tāua ei ke faka'mafa atu a te (a) alofa mo te poto o leova? (e) tāua o te fakagalue aka o akoakoga fakavae i te Tusi Tapu? (i) manakoga ke 'sala atu muamua faeloa ki te takitakiga a leova a koi tuai o fai se fakaikuga? (2) E fesoasoani atu pefea a te 'sili atu o fesili konei ke iloa ne koe me ko oko 'tonu atu a te munatonu ki te loto o tau akoga? (a) E mata, e 'tagi 'lei ki a koe a te fakamatlagi tenei? (e) E mata, e fetaui 'lei te mea tenei mo te alofa o te Atua? (i) Ne a mea aoga e lavea atu māfai e fakagalue aka a vaegā pati fakatonutonu penā?

20 minu: "Taina Talavou, e Kausaki Atu Koutou ki Tauliaga?" Fesili mo tali. Ke faka-sau'tala malie aka se toeaina io me se tavini fesoasoani telā ne kausaki atu i te taimi koi foliki ei a ia. Ne a tofiga mo akoakoga ne maua ne ia a koi tuai o 'tofi aka a ia mo fai se tavini fesoasoani? Ne fesoasoani atu pefea a nisi tino i te fakapotopotoga ke gasolo atu a ia ki mua i te feitu faka-te-agaga? Ne a fakamanuiaga ne maua ne ia ona ko tena kausaki atu ki tau-liaga?

Te Pese e 85 mo te 'Talo

Taina Talavou, e Kausaki Atu Koutou ki Tauliaga?

¹ "So se tagata e fia maua ne ia . . . , e manakogina ke fai ne ia a galuega 'lei." (1 Timo. 3:1) E fakamalosi atu a pati fakaosofia konā ki taina ke kausaki atu ke fetaui 'lei latou mō tau-liaga i te taviniga i te fakapotopotoga. E mata, e 'tau o matua 'ki koe ke fai penā? A te 'tonuga loa, e sili atu i te 'lei māfai e kamata koe o kausaki atu ki ei i te taimi koi talavou ei koe. I te auala tenei e fai ei ke fakamasani koe ki mea e uke kae fakaasi atu foki ei tou fetaui 'lei ke 'tofi aka koe mo fai se tavini fesoasoani i te taimi ko matua ei koe. (1 Timo. 3:10) Kafai koe se taina talavou papatiso, e mafai pefea o kausaki atu koe?

² **Te Alofa sē Fakapito:** Masaua me e kausaki atu koe ki *galuega 'lei*, kae e se ko te 'tofi. Tela la, ke ati aka se uiga fia fesoasoani atu ki ou taina mo tuagane. A te auala e tasi ke fai penā ko te mafaufau 'loto ki te fakaakoakoga 'lei a Iesu. (Mata. 20:28; Ioa. 4:6, 7; 13:4, 5) Akai atu ki a Ieova ke fesoasoani atu ke maua ne koe a te loto fia saga atu ki nisi tino. (1 Koli. 10:24) E mata, e mafai o fesoasoani atu koe ki tino i te fakapotopotoga kolā ko ma'tua io me ma'saki? E mata, e mafai o fakaavanoa ne koe a koe eiloa ke 'kati a mouku, 'teu a te tafāfale io me ko te faiga o nisi mea i te tausiga o te Kingdom Hall? Io me e mata, e mafai o volenitia atu ke fai ne koe se lāuga i te Akoga mō Tino Talai? Ka lavea ei ne koe me i tou fesoasoani

1. Ko te taimi fea e 'tau ei mo se taina talavou o kamata o fakagalue aka a te fakatakigaga telā e maua i te 1 Timoteo 3:1?
2. E mafai pefea o ati aka kae fakaasi atu ne tatou a te uiga ko te alofa sē fakapito?

**Ona ko te uke o tino 'fou ko
o'mai ki loto i te munatonu,
ko manakogina eiloa a tāgata
ma'losi faka-te-agaga ke tausi
atu ki tiute i fakapotopotoga**

atu ki nisi tino ka maua eiloa ne koe i ei a te fiafia.—Galu. 20:35.

³ Malosi Faka-te-Agaga: E sili atu te tāua ke malosi 'lei i te feitu faka-te-agaga a te tavini fesoasoani i te fakapotopotoga i lō te mauaga o taleni fakapito io me ko atamai totino. A te tagata telā e malosi faka-te-agaga e taumafai ke maua ne ia a te kilokiloga a Ieova mo Iesu. (1 Koli. 2:15, 16) E fakaasi atu ne ia a "fuataga o te agaga." (Kala. 5:22, 23) A ia se tino talai loto finafinai telā e fakamuamua ne ia a manakoga o te Malo. (Mata. 6:33) E mafai o ati aka ne koe a uiga faka-te-agaga mai i te tumau i se fakasologa 'lei o sukesukega totino. E mafai o aofia i te mea tenei a te faitau ki te Tusi Tapu i aso katoa, te faiatuga o lōmiga takitasi o *Te Faleleleo Maluga* mo te *Ala Mai!*, mo te fakatoka kae kau atu ki fakatasiga a te fakapotopotoga. (Sala. 1:1, 2; Epe. 10:24, 25) I te taimi ne fakamalosi atu ki te talavou ko Timoteo ke gasolo atu i te feitu faka-te-agaga, ne tusi atu a Paulo: "Saga faka'lei faeloa ki . . . au akokoga." (1 Timo. 4:15, 16) Tela la, galue malosi o fakatoka faka'lei ki ou tōfiga i te Akoga mō Tino Talai. Fakatoka mō te galuega talai, kae kau atu faeloa ki ei. Ke fakatoka kae kausaki atu ki fakamoemoega faka-te-agaga, e pelā mo te paenia, taviniga i te Peteli, io me ko te kau atu ki te Akoga mō Taina Taka. A te malosi faka-te-agaga ka fesoasoani atu ki a koe ke "tele keatea mai manakoga masani o talavou." —2 Timo. 2:22.

⁴ Te Fakatuagagina mo te Fakamaoni: Ona ko te mea ne 'tofi aka a taina kolā e "fakatuagagina" ke fakasoa atu ne latou a mea'kai ki Kelisiano ma'tiva i te senitenali muamua, e fakamaoni mai i ei me ne fakatuagagina kae fakamaoni latou, ne seki 'tau o manava'se a te kau apositolo e uiga ki te galuega me ne fai io me ikai. Ne tuku atu ei ne te mea tenei a te avanoaga ke 'saga malosi atu fua latou ki nisi mea tāua. (Gal. 6:1-4) Tela la, kafai e tuku atu se tōfiga i te fakapotopotoga ke fai ne koe, ke na fai eiloa te 'toe mea e mafai ne koe o fai. Fakaakoako ki a Noa, telā ne tautali faka'lei atu eiloa ki fakatonuga kolā ne tuku atu ke faite a

3. E pefea te tāua o te malosi faka-te-agaga, kae e mafai pefea o fakamalosi aka?
4. Se a te tāua o te fakatuagagina mo te fakamaoni?

te vaka. (Kene. 6:22) E fakatāua eiloa ne Ieova a te fakamaoni mo te fakaasiga o te matua 'lei i te feitu faka-te-agaga.—1 Koli. 4:2; ke onoono ki te pokisi ko "Te Aoga o te Fakamasani Faka'lei."

⁵ E pelā mo te mea ne 'valo mai, e fakavave ne Ieova te fakamaoopopoga o tino. (Isa. 60:22) E pelā eiloa mo te aofaki masani, e nofo eiloa pelā ki te kuata o te miliona o tino e papatiso i tausaga katoa. Ona ko te mea tenā, ko tokouke a tino 'fou ko o'mai ki loto i te munatonu, tela la, ko manakogina eiloa a tāgata ma'losi faka-te-agaga ke tausi atu ki tiute i fakapotopotoga. Ko sili atu eiloa nei i lō taimi mua a te uke o galuega e 'tau o fai i te taviniga a Ieova. (1 Koli. 15:58) Taina talavou, e a, e kausaki atu koutou ki tauiliaga? Kafai e penā loa, e manakogina ke fai ne koe a galuega 'lei!

5. Kaia e 'tau ei mo taina talavou o kausaki atu ki tauiliaga?

Te Aoga o te Fakamasani Faka'lei

E maua eiloa ne taina talavou kolā e fetaui 'lei a mea aoga māfai ko tuku atu ne toeaina a tōfiga kae fakamasani aka latou ki ei. Ne sagasaga se ovasia o te fenua i luga i te tulaga i te taimi ne tuku atu ne ia a fakamalosiga ki se tino talai mai tua o te fakatasiga. Ne lavea ne ia se tamā tamaliki tagata e tu pili atu, telā ne fesili atu me e faka'tali tou tagata ke faipati atu ki a ia. Ne tali atu a te tamaliki tagata me ne 'tofi aka a ia ke 'teu a te tulaga mai tua o fakatasiga katoa. Ko toka ana mātua ke olo atu ki te fale, kae ne ita 'ki tou tagata ma fano kae seki fakataunu tena tōfiga. Ne fiafia malosi eiloa a te ovasia o te fenua. Ne fai mai tou tagata: "Ne matapula'pula eiloa a toeaina i te fakapotopotoga tenā ke fakamasani a taina talavou kolā ko fetaui 'lei mai i te tukuatuga ki a latou o tōfiga i te fakapotopotoga. I te auala tenā, e se faigata ei ki a latou ke 'tofi aka se taina talavou mo fai se tavini fesoasoani māfai ko āsi atu au ki te fakapotopotoga."

TE VAIASO E KAMATA I A IULAI PO 22

Te Pese e 22 mo te 'Talo

□ Sukesukega a te Fakapotopotoga ki te Tusi Tapu:

bt mata. 10 ¶1-9, pokisi i te itu. 89 (30 minu.)

□ Te Akoga mō Tino Talai:

Faitauga ki te Tusi Tapu: Galuega 22-25 (10 minu.)

Napa 1: Galuega 22:17-30 (4 minu. io me mu'tana ifo)

Napa 2: Ne a Auala e 'Nofo Atu ei Tatou i te Lalolagi Kae e se Fai Tatou mo Fai ne Vaega o te Lalolagi?—loane 17:15, 16 (5 minu.)

Napa 3: Ne a Mea e se 'Kau Atu ei ki se Feitu a Kelisiano 'Tonu?—lv mata. 5 pokisi i te itulau e 61 mo te mataupu fakaopoopo i te itulau e 243-246 (5 minu.)

□ Te Fakatasiga mō te Galuega Talai:

Te Pese e 41

10 minu: Manakoga o te fakapotopotoga.

20 minu: "Faifaiga 'Fou o te Galuega Talai." Fesili mo tali. Ke taku atu so se fakatoga a te fakapotopotoga i te talai atu ki tino katoa mai te fakaaogaga o taipola mo mea fakateka'teka kolā e faka'pa i ei a ata o tusi, kae ke fakamatala atu foki ne tala 'gali.

Te Pese e 95 mo te 'Talo

Faifaiga 'Fou o te Galuega Talai

¹ Ne uke atu a mea ne fai ne Kelisiano i te senitenali muamua i lō te talai atu fua mai fale ki fale. Ne talai atu latou i koga kolā e tokouke a tino i ei. (Galu. 20:20) E pelā mo te faletapu, te koga telā ne iloa ne latou me e mafai o maua i ei a tino e tokouke. (Galu. 5:42) I te taimi ne nofo atu ei i Atenai, ne talai atu a te apositolo ko Paulo i aso katoa ki tino kolā ne 'nofo atu i te maketi. (Galu. 17:17) I aso nei, a te auala tāua e fakasalalau atu ei a te tala 'lei ko te talai atu mai fale ki fale. E se gata i ei, e olo atu foki tatou ki koga e faka'tu i ei a motoka, ofisa ga'lue, malae ta'fao, koga e tokouke a tino i ei, mo nisi koga ko te mea ke

1. Se a te fakaakoakoga ne tuku mai ne Kelisiano i te senitenali muamua?

talai atu ki tino i so se koga e mafai ei o maua atu latou. E tiga eiloa e fakamalosi atu ki tino talai katoa ke talai atu i so se koga, ka maua eiloa ne tino e tokouke a te avanoaga ke aofia i auala 'fou fakafia'fia e lua ke talai atu i so se koga.

² Te Galuega Talai Fakapito i Fa'kai 'Lasi:

E pelā mo te mea ne lipoti mai i te 2013 Yearbook i te itulau e 16 mo te 17, ne kamata o tofotofo aka ki se faifaiga fou o te galuega talai i te Fa'kai o Niu Ioki i a Novema 2011. Ne faka'tu aka taipola mo mea fakateka'teka kolā e faka'pa i ei a ata o mekesini mo tusi i 'gana kese'kese i kogā koga o fa'kai kolā e tokouke a tino e oloolo atu i ei. I aso takitasi, e lau i afe o tino e sa'sale atu i konā, kae e aofia i ei a tino e tokouke kolā e 'nofo i tamā potu i fale 'lasi kolā e 'pui faka'lei kae e penā foki loa mo tino kolā e masani o 'galo i olotou fale. Ko se faka'tau eiloa i te fakaoofofogia o ikuga ne maua mai i ei. I se masina fakamuli fua nei e tasi, ne tufa atu ei a mekesini e 3,797 kae e 7,986 a tusi. Ne fakamolemole atu a tino e tokouke kolā ne oloolo atu i konā mō se akoga faka-te-Tusi Tapu. Ona ko te mea ne fakatāua a te faiga o akoga faka-te-Tusi Tapu, so se fakatuatusi ne tuku atu ne tino fia'fia, ne lafo fakavave atu ne latou ki te 'toe fakapotopotoga pili atu eiloa ki ei ko te mea ke āsi atu ki tino fia'fia.

³ Ona ko te iku manuia o te faifaiga tenei, ko oti foki ne kamata o tofotofo ki ei i nisi kogā koga o te lalolagi kolā e tokouke 'ki eiloa a tino e 'nofo i ei. Ka fakaasi mai eiloa ne te ofisa lagolago o te fenua a fa'kai 'lasi kolā ka aoga malosi ki ei a te faifaiga tenei. E masani eiloa ko fa'kai kolā e uke a koga faka'tu pasi io me ko koga e 'tu i ei a ofisa e uke mo potu 'togi i fale 'lasi kolā e uke a tino e oloolo sāle i ei. Mai tua i konā, ko fesokotaki atu ei a te ofisa lagolago ki fakapotopotoga kolā ka aofia i te faifaiga tenei kae tuku atu foki a nisi fakatonuga. E masani eiloa o fakaaoga a paenia tu-mau mo paenia fakapito, kae i nisi koga ne 'kau atu foki a paenia lagolago ki ei.

⁴ Te Auala ke Talai Atu ei: A latou kolā ne

2. Se a te faifaiga fou ne tofotofo ki ei i a Novema 2011?
3. Ne fakalauefa atu pefea a te faifaiga fou tenei?
4. E fai pefea a te galuega talai fakapito tenei i fa'kai 'lasi?

aofia i te galuega talai fakapito tenei i fa'kai 'lasi e masani eiloa o faka'tali ki tino ke olo atu ki te taipola io me ko te mea fakatekateka telā e faka'pa atu ei a ata o tusi. Kafai e fanatu se tino, e 'kami atu eiloa a ia ke puke so se tusi telā e fiafia a ia ki ei. E fia'fia eiloa a paenia o tali atu mai i te Tusi Tapu so se fesili telā e mafai o 'sili atu ne tino. Kafai e puke ne ia se tusi, e se taku atu ne paenia a te fakatokaga e uiga ki te faiga o meaalofa tupe. Kae kafai e fesili mai a ia e uiga ki te auala e 'lago atu ei ki te 'tou galuega i mea tau tupe, e mafai o fakamatala atu ne latou me e mafai o avatu a meaalofa ki so se fakatuatusi telā e maua i loto i te tusi. Kafai e 'lei, e fesili atu latou: "E mata, e fiafia koe ke āsi atu se tino ki tou fale?" io me "E mata, e iloa ne koe me e mafai o fai se akoga faka-te-Tusi Tapu sē 'togi i te tusi tenā?"

⁵ A te aofia i te faifaiga tenei ne fai eiloa mo fai se mea fakafafia 'ki. Ne tusi mai se tauavaga e tokotasi: "A te tu atu i te taipola kae lavaea atu a te fia afe o tino e ooloolo sāle i aso takitasi ne faka'mautakitaki aka ei i ma loto a te lasi o te galuega telā ko oti ne fai ke oko atu ki tino i te lalolagi kātoa. A te lavea atu o te tokouke o tino mo te mafaufau ki te alofa tonu o Ieova ki tino taki tokotasi ne fakamalosi aka ei te ma manakoga ke tumau i te faiga o te galuega talai mo fai te 'toe mea tāua i ma olaga. E fakaataata eiloa i ma mafaufauga a te auala e iloilo ne Ieova a loto o tino katoa kolā e ooloolo sāle i tafa o taipola, mai i te 'sala atu ki tino kolā e fetaui 'lei mō te ola. E mafau'fau māua me ko pilipili eiloa māua ki te fai mo fai ne tino e ga'lue fakatasi mo te kau agelu."

⁶ **Te Galuega Talai Telā e Fakatoka ne te Fakapotopotoga:** E se gata fua i te galuega talai fakapito tenei i fa'kai 'lasi, e isi foki se fakatokaga fou telā ko fakatoka ne potukau o toeaina e tokouke i olotou fakapotopotoga. E auala i te faifaiga tenei, e fakaaoga ne tino talai a taipola io me se mea fakatekateka telā e faka'pa i ei a ata o tusi i se koga telā e tokouke

5. Ne fai pefea a te kau atu ki te faifaiga fou tenei mo fai se mea fakafafia ki se tauavaga?

6. (a) Se a te suā faifaiga o te galuega talai telā ko oti ne fakatoka ne fakapotopotoga e uke, kae e 'kese pefea mai i te galuega talai fakapito i fa'kai 'lasi? (e) E ga'lue fakatasi pefea a fakapotopotoga māfai ko 'kau atu ki te galuega talai?

a tino e ooloolo atu i ei i *loto eiloa i te koga talai a te fakapotopotoga*. E 'kese a te mea tenei mai i te talai fakapito atu i so se koga i fa'kai 'lasi, telā e fakaaoga i ei a tino mai fakapotopotoga e uke ke talai atu i koga kolā e tokouke a tino e ooloolo i ei kae ne filifili aka foki ne te ofisa lagolago.—Ke onoono ki te pokisi "E Manakogina a te Fakatau Fesoasoani 'Lei."

⁷ Ka onoono eiloa a toeaina me e isi ne kogā koga i koga talai a te fakapotopotoga kolā e uke a tino e ooloolo i ei kae fakaiku aka me

7. I koga kolā e 'lei, ka fakatoka pefea ne toeaina a te galuega talai i koga talai a te fakapotopotoga?

E Manakogina a te Fakatau Fesoasoani 'Lei

Ko oti eiloa ne lipoti mai me e isi ne tino talai mai i fakapotopotoga 'pili ne 'kau atu ki te galuega talai i koga e ooloolo ei a tino, i te auala, koga faka'tu motoka, mo ofisa io me ko koga e faka'tali ei a tino ki mea fakatele'tele. Ko oti ne tuku atu ne tino talai mai fakapotopotoga kese'kese a mekesini i talāluma, potu faka'tali, io me ko fale 'tagatu kae talai atu foki ki ofisa i te kogā koga eiloa e tasi. E fakaitaita atu eiloa te mea tenei ki tino ga'lue mo tino i te kogā koga tenā i taimi penā, ke oko foki eiloa māfai e kese'kese a taimi e talai atu ei a tino talai. Tela la, e sili atu eiloa i te 'lei ke *talai atu i te koga talai a te otou fakapotopotoga* māfai ko 'kau atu ki te vaega tenei o te galuega talai.

Kafai e ma'nako a tino talai ke 'kau atu ki te vaega tenei o te galuega talai i te koga talai a te suā fakapotopotoga, e 'tau o fai'pati atu latou ki te lotou ovasia o te galuega talai. E mafai ne tou tagata o fesokotaki atu ki te ovasia o te galuega talai a te suā fakapotopotoga ke maua mai ei te taliaga a koi tuai o olo atu ki ei a latou mai tena fakapotopotoga. I koga kolā e 'tofi aka ei a fakapotopotoga i 'gana kese'kese ke ga'lue tasi i te koga e tasi, e 'tau o fesokotaki faka'lei a ovasia o te galuega talai ko te mea ke mo a ma sona fakaitaita atu ki tino. E auala i te fakatau fesoasoani 'lei, e mafai ei o fai a mea katoa ke "fanofano 'lei mai te faiga o fakatokaga 'lei."—1 Koli. 14:40.



e 'lei ke fakatoka ne koga ke talai atu i so se koga. A koga 'lei ke faka'tu i ei a taipola io me ko te mea fakatekateka telā e faka'pa i ei a ata o tusi, ko koga kolā e faka'tali ei a tino ke 'sopo atu ki mea fakatele'tele mō tino katoa, te kogāloto o te fa'kai, malae ta'fao, auala e uke a tino e oloolo i ei, fale kolā e uke a sitoa i loto i ei, kōlisi, malae vakalele, mo koga e fai sāle i ei a faigā mea. E isi eiloa se pogai 'lei ke faka'tu a taipola i te koga, te aso, mo te taimi eiloa e tasi. Ko oti ne iloa aka me e sili atu i te ma'goi o taipola e fakatoka mai tua o fale 'lasi kolā e uke a sitoa i ei i lō koga mai tua o se sitoa lasi e tasi me i tino e olo atu ki ei e 'saga atu fua loa ki te pogai e olo atu ei latou ki te sitoa tenā. I nisi koga, e pelā mo koga sa'sale, e mafai o 'lei ke fakatu i konā se tamā mea fakatekateka telā e faka'pa i ei a ata o tusi. E mafai o *download* mai ne toeaina a polokalame fakapito ke faite ki ei a fakailoga o mekesini ko te *Faleoleole Maluga* mo te *Ala Mai!* mo te tusi ko te *Akoakoga a te Tusi Tapu*. Ko oti eiloa ne fakatoka a polokalame fakapito konai ke fakaaoga i te vaega tenei o te galuega talai. A latou kolā e aofia i ei ka fai eiloa ne latou i te auala foki telā e fakaaoga ne tino kolā e aofia i te galue-

ga talai fakapito tenei i fa'kai 'lasi kae e 'tau o tau'tali faka'lei atu ki te takitakiga a te ovasia o te fenua. Kafai e maua ne latou se fakatuatusi mai i se tino fiafia telā e se nofo i te lotou koga talai, e 'tau o faka'fonu fakavave a te pepa ko te *Please Follow Up* (S-43) kae tuku atu ki te failautusi.

8 Te Galuega Talai i Tou Koga Talai Tōtino: Kāti e sei ne koga kolā e uke a tino e oloolo sāle atu i koga talai a te otou fakapotopotoga ke mafai o fakatu i ei se taipola io me se mea fakatekateka telā e faka'pa i ei a ata o tusi. Kae ke oko foki eiloa ki fakapotopotoga konā, e fakamalosi atu ki tino talai ke mafau-fau ki te vaega tenei o te galuega talai i te taimi e talai atu ei latou. E mata, e isi se fale lasi e 'tu i ei a sitoa valevale, io me se sitoa telā e uke a tino e olo sāle atu ki ei i te otou koga talai? E mata, e isi se malae io me se koga telā e olo sāle atu ki ei a tino? E mata, e isi ne fai-gā mea kolā e fai faeloa i tou koga talai? Kafai e isi, koi mafai eiloa o aofia koe i te vaega tenei o te galuega talai.

9 Ko te loto eiloa o Ieova "ke faka'sao a tino katoa kae ke iloa tonu ne latou a te munatonu." (1 Timo. 2:4) Tela la, e taumafai tatou ke oko atu ki tino e tokouke e mafai ne tatou mo te fekau o te Malo a koi tuai o oko mai te gataga. (Mata. 24:14)



I koga e uke, e faigata eiloa ke maua atu a tino i fale. Kae e mafai eiloa o fai'pati atu tatou ki a latou māfai e maua atu i koga kolā e tokouke a tino i ei kae e se ko olotou fale. A te talai atu i so se koga, kāti ko te auala fua e tasi ka maua ei ne nisi tino a te avanoaga ke faka'logo ki te tala 'lei. Tela la, e mafai eiloa o faka-taunu katoatoa 'tou galuega mai i te talai atu ki tino i so se koga e maua atu ei latou.—2 Timo. 4:5.

8. Kafai e sei ne taumafaiga ne fakatoka ne te fakapotopotoga mō te vaega tenei o te galuega talai, ne a avanoaga ke talai atu ki tino koi mafai eiloa o fai ne tatou?

9. Kaia e 'tau ei o ga'lue malosi tatou i te talai atu ki tino i so se koga e maua atu ei latou?

TE VAIASO E KAMATA IA IULAI PO 29

Te Pese e 51 mo te 'Talo

□ Sukesukega a te Fakapotopotoga ki te Tusi

Tapu:

bt mata. 10 ¶10-21 (30 minu.)

□ Te Akoga mō Tino Talai:

Faitauga ki te Tusi Tapu: Galuega 26-28 (10 minu.)

Napa 1: Galuega 26:19-32 (4 minu. io me mu-tana ifo)

Napa 2: Se a te Agaga o te Lalolagi Kae e 'Teke Atu Pefea Tatou ki ei?—/v mata. 5 pala. 7-10 (5 minu.)

Napa 3: Auala Kolā e Lavea Atu ei te Malosi o te Agaga o te Atua i Ana Tavini—Kala. 5:22, 23; Faka. 22:17 (5 minu.)

□ Te Fakatasiga mō te Galuega Talai:

Te Pese e 96

15 minu: Se Fesili ke Mafaufau ki ei. Se sau'talaga mo se toeaina.

15 minu: Ke Tumai i te Fakamaoni Atu me e Fai Koutou mo Tama a te Otou Tamana. (Mata. 5: 43-45) Se sau'talaga telā e fakavae ki te 2013 Yearbook, te itulau e 89, te palakalafa e 3, ki te itulau e 90, te palakalafa 1, mo te itulau e 164, te palakalafa e 2. 'Kami atu a te kautaina ke taku mai ne latou a mea aoga ne tauloto ne latou mai i ei.

Te Pese e 80 mo te 'Talo

SE FESILI KE MAFAUFAU KI EI

■ A koi tuai o talia se tino talai seki papatiso mō te papatisoga, e pefea te leva e 'tau ei o kau atu a ia ki fakatasiga a te fakapotopotoga mo te galuega talai?

A te papatisoga ko te 'toe fakaikuga tāua eiloa ka fai ne se tino. Tela la, a koi tuai o talia se tino mō te papatisoga, e 'tau o malamalamā 'lei a ia i mea kolā e manako te Atua ke fai ne ia. E se gata i ei, ko oti foki ne 'tau o fakaasi atu ne ia tena fakaikuga ke ola e 'tusa mo mea e manako ki ei te Atua.

E fakatonu atu ki Kelisiano ke mo a ma 'galo sāle i fakatasiga, tela la, ko oti eiloa ne 'tau o fakaasi ne te tino talai kae seki papatiso a te loto fiafia ke kau atu ki fakatasiga a te fakapotopotoga. (Epe. 10: 24, 25) E fai foki eiloa ana tali. Kāti ko oti foki ne kau atu a ia ki te Akoga mō Tino Talai, faitalia me e se aofia a te mea tenei i mea kolā e 'tau o fai muamua.

E se gata i ei, ona ko te mea ko oti ne tuku atu ki Kelisiano a te galuega ke talai atu te tala 'lei kae fai a soko, e 'tau eiloa o kau atu faeloa a te tino talai kae seki papatiso ki te galuega talai a koi tuai o papatiso a ia. (Mata. 24:14; 28:19, 20) E fia masina e 'tau ei o kau atu a ia ki te galuega talai a koi tuai o papatiso? A te 'tonuga loa, e 'tau o lava a te taimi ke fakaasi atu ei ne ia tena 'mautikitaki ke kau atu faeloa mo te loto

finafinau ki te galuega talai i te fia o masina. (Sala. 78:37) Kae e se 'tau eiloa o leva 'ki mai te taimi ne kamata ei o talai ke oko atu ki te taimi ko fetaui 'lei ei a ia mō te papatisoga, kāti i ne nai masina fuā. E pefea te uke o itula e 'tau o lipoti mai ne ia mō te galuega talai? E seiā eiloa ne tulafono mautinoa e uiga ki te mea tenei. E 'tau o onoono a toeaina ki tulaga kese'kese o tino talai takitasi kae mafaufau faka'lei kae ke paleni 'lei foki.—Luka 21:1-4.

E 'tau o masaua ne toeaina (io me ko tavini fesoasoani i fakapotopotoga kolā e se tokouke a toeaina i ei) kolā e fai ne latou a fesili a te kau ka papatiso me e kese'kese a tino katoa, kae e 'tau o fakaaoga ne latou a faka'tauga 'lei me ko fetaui 'lei io me ikai a ia mō te papatisoga. E fakamoe'moe eiloa latou ke maua ne ia a te manakoga tonu ke fai mo fai se Molimau a Ieova kae ke fakaasi atu foki tena loto fakafetai ki te tauilaga ke kau atu ki te fakapotopotoga a Ieova mo te galuega talai. E malamalamā a toeaina me e seki gasolo atu a ia ki te matua 'lei i te feitu faka-te-agaga io me e seki maua ne ia a te atamai o tino talai papatiso. Kafai e mafau'fau a toeaina me e se fetaui 'lei se tino mō te papatisoga, e 'tau o fakailoa atu ne latou mo te alofa ki a ia a pogai faka-te-Tusi Tapu mō te lotou fakaikuga kae fesoasoani atu ki a ia i te feitu faka-te-agaga.

TE VAIASO E KAMATA I A AOKUSO PO 5

Te Pese e 77 mo te 'Talo

□ Sukesukega a te Fakapotopotoga ki te Tusi Tapu:

bt mata. 11 ¶1-4, pokisi i te itu. 95, 98, 99 (30 minu.)

□ Te Akoga mō Tino Talai:

Faitauga ki te Tusi Tapu: Loma 1-4 (10 minu.)

Napa 1: Loma 3:21–4:8 (4 minu. io me mu'tana ifo)

Napa 2: Te Pogai e Mafau'fau ei a Kelisiano 'Tunu me i a Latou ne "Tino Fakaa'lafa Kae se 'Nofo Tumau" i te Lalolagi.—1 Pe. 2:11; 1 Ioa. 2:15-17 (5 minu.)

Napa 3: E Fakaasi Atu Pefea ne Tatou i 'Tou Gatu mo Teuga me e se Fai Tatou mo Fai ne Vaega o te Lalolagi?—/v mata. 5 pala. 11-15 (5 minu.)

□ Te Fakatasiga mō te Galuega Talai:

Te Pese e 79

10 minu: Manatu mō te Ofoatuga o Mekesini i a Aokuso. Se sau'talaga. Ke fakaaoga se 30 ki te 60 sekone ke fakamatala mai a te pogai ka fia'fia ei a tino i tou koga talai ki te mekesini tenei. Ko fakaaoga ei a mataupu kamata o *Te Faleleoleo Maluga* kae 'kami atu a te kautaina ke tuku mai ne manatu fesoasoani ki se fesili gali mo se tusi faitau ke fakaaoga i te ofoatuga.

10 minu: Manakoga o te fakapotopotoga.

10 minu: Ne a Mea ne Tauloto ne Tatou? Se sau'talaga. Ke faitau te Luka 5:27-32. Mafau'fau ki te auala e mafai ei o fesoasoani mai a te tala tenei i te 'tou galuega talai.

Te Pese e 119 mo te 'Talo

Faka'pulaga

■ Tusi kolā e ofo atu i te masina o **Iulai mo Aokuso:** Te polosiuia ko *Te Tala 'Lei Mai te Atua!*

Setema mo Oketopa: Te mekesini ko *Te Faleleoleo Maluga.*

■ E 'tau o tuku atu ne te fakapotopotoga a te lotou ōta ko te mea ke oko atu ki te ofisa lagolago mai mua o te po 10 o masina takitasi.

■ A tusi fakamolemole ke ga'lue i koga kolā e sei se fakapotopotoga e tausí ki ei, e 'tau o tala muamua ne toeaina i tau fakapotopotoga, ko avatu ei ki te ofisa lagolago kāti i se lua masina mai mua o te taimi e fia kamata ei koe.

Pati Fakatomua Fesoasoani

Ke Kamata a Akoga Faka-te-Tusi Tapu i te Aso Ono Muamua i a Aokuso

"Toeitiiti ko tino katoa e 'talo atu i se taimi e tasi io me se isi taimi. Ke oko foki ki tino kolā e se tali'tonu ki te Atua, e 'talo atu māfai ko fe'paki latou mo fakalavelave. Se a tau faka'tau, e mata, e fakalogologo a te Atua ki 'talo katoa?" Faka'tali ki se tali. Fakaasi atu te tua o te *Faleleoleo Maluga* i a Aokuso 1, kae mafau'fau fakatasi ki te mataupu mai lalo i te fesili muamua mo se tusi faitau e tasi mai i ei. Ke ofo atu a te mekesini, kae fakatoka ke toe foki atu o sau'tala ki te suā fesili.

Masaua: E 'tau o fai se fakaasiga ki pati fakatomua konei i te fakatasiga mō te galuega talai i a Aokuso po 3.

 **FALELEOLEO MALUGA Aokuso 1**
E POLAPOLA ATU EI TE MALO O IEOVA

"E āsi malie mai matou ona ko te mea ko manava'se malosi a tino e tokouke ki te lauiloa o te onoono ki ata ma'sei. Kae e mafau'fau a nisi tino e tokouke me i ata ma'sei e se fakalogomae mai. Se a tau faka'tau? [Faka'tali ki se tali.] Ne fai mai a Iesu me e mafai o iloa ne tatou se mea 'lei e auala i fuataga kolā e 'fua mai i ei. [Faitau te Mataio 7:17.] E fakamatala mai i te mekesini tenei a fuataga e 'fua mai i te onoono ki ata ma'sei. E tuku mai foki i ei a manatu aoga ki te auala ke 'kalo keatea mai i ata ma'sei."

Te Lipoti Toetoe mō te Galuega Talai

Ko oko eiloa i te gasolo vave ki mua o te galuega i Kilipati. I a Ianuali ne fanaka i te 32% a te aofaki o mekesini ne tufa atu, e 56% a toe asiga, kae e 11% te fanakaga i akoga faka-te-Tusi Tapu māfai e fakatusa ki te tausaga ko teka.